

Cussì la cjarte e cjante

In mût diferent di altris corâls che a sielzin il disc (vuê al sarès un Cd) par imortalâ i lôr cjants, il Côr Cjastelîr di Tombe di Merêt al à sielzude une altre strade par restâ inte memorie de int, sedi chê dal Friûl, sedi chê foreste: la cjarte stampade.

In altris peraulis, il côr al à sostignût une imprese no facile e di un ciert spessôr dal so diretôr **Maurizio Del Giudice**, publicant come editôr cutuardis cjants componûts dal lôr mestri in dôs versions: par côr maschîl e par côr mist. Del Giudice al è lâat a spulzinâ lis poesis di poetis contemporanis, sedi in lenghe furlane che in lenghe taliane. Ve alore che o cjatin poesiis, o parts di poesiis scrits di pre **Toni Beline**, di **Pier Paolo Pasolini**, di **Adriana Tuan Montanar** e, ancjemò, dal poete di Merêt, **Pieri Somede dai Marcs**, di **Otmar Muzzolini** (Meni Ucel), la splendide poesie di L. Vahira "Il silenzio", ben cuatri poesiis de poete di Sant Duri, **Giacomina De Michieli**, un test di **Camilla Olivelli**, un di **Giovanni Lorenzon** e un di **Alessandro Lutman**.

Come che al scrîf il stes mestri inte presentazion, par "colmâ e corezi lis mès scjar-



Il Côr Cjastelîr di Tombe di Merêt al à publicât come editôr cutuardis cjants componûts dal mestri **Maurizio Del Giudice** su la fonde di poesiis in lenghe furlane e taliane. » DI FLAVIO VIDONI

sis cognossincis di armonie" al à clamât in jutori, pe armonizazion des sôs melodis, cualchi amî musicist, in particolâr i mestris furlans **Adelchi Zoratti** e **Andrea Venturini** e il belumat **Luciano Casanova Fuga**. Un altri amî musicist, **Vittorino Zuliani**, al à trascrit lis partiduris al computer.

CONTRIBÛT AL CJANT CORÂL

"Cun chescj cutuardis cjants o speri di vê dât un gno piçul e modestissim

contribût al cjant corâl che tant o ami e che tant mi à dât in ducj chescj agns" al à dit Del Giudice ae presentazion dal librut inte sale parrochiâl di Tombe. Il librut di 94 pagjinis, intitulât "Cumò cjape ce ch'al è", titul ripuartât dal toc di viertidure di pre Toni Beline, insiorât di doi bieî dissens di **Daniela Comis**, al puarte i spartîts dai cutuardis cjants cun insonm i tescj par furlan e par talian.

✉ alessandro.digiusto@ilfriuli.it

■ CONCORS FOTOGRAFIC

I vincidôrs di 'Fûrxfur a colps di selfie'

A son **Admir Adrovic** di Cividât, **Sabina Vilotta** di Majan, **Rosa Savani** di Mortean e **Marina Archidiacono** di Udin i ultins vincidôrs de edizion 2015 dal concurs fotografic "Fûrxfur a colps di selfie". Ducj i participants aes manifestazions plui populârs che si son davueltis intal 2015 in Friûl a jerin stâts invidâts a scâtâ un selfie originâl cul furlan come sogjet e cjariâlu intal spazi di Instagram. I miôr scats a àn vinçût une batarie esterne par celulârs e une schirie di materiâi e gadget Arlef.

Il concurs al è stât dome che un dai elements di sucès dal proget Fûrxfur che al ambis a promovî il status de lenghe furlane.

Par restâ in contat cu lis novitâts dal proget Fûrxfur, si pues iscrivisi al grup Facebook: www.facebook.com/groups/furXFUR/.

SCOLTADIS DI DRIUS

Regule de valîs

E jè une regule: le robe che tu mètis te valîs cuand che tu partissis no jentrarâ mai te stes valîs cuand che tu tornis.



Leç de editorie, pericol discriminazion

IL PARÈ. La gnove leç a poie de editorie e fâs riferiment esplicit aes minorancis linguistichis, ma il pericol al è che ancjemò une volte il furlan e la editorie in lenghe furlane a sedin discriminâts. Lu scrîf **Diego Navarra**, president de Assemblee de comunitât linguistiche furlane. "I dossiers de Cjamare che a àn acompagnât il proviodiment - al conte Navarra - a son esplicitis: i contribûts fint a vuê a son stâts risiervâts aes impresis editoris che a publichin cuotidianis in lenghe

francese, ladine, slovene e todescje intes regjons autonomis Val di Aoste, Friûl - Vignesie Julie e Trentin Alt Adis.

No ai notiziis di interventis di deputâts furlans in difese de nestre lenghe. Mi somee di rivivi lis stesis situazions di un an indaûr cuant che, inte leç di riforme de Rai a vignirin esclududis parimentri lenghe furlane e sarde. Al va indevant



duncje une disposizion discriminatorie dal Guvier bande lis minorancis e une insolence aes normis costituzionâls e ae leç 482/99. No si pues sopuartâ il comportament dal nestri Parlament che al va indevant a jessi mari cun cualchi popolazion e madrigne cun altris. Al displâs, a pet des protestis dai deputâts sarts, no vè sintût nissune vôs di nestrîs rapresentants a difese dai dirits dai furlans. Cumò che la peraule e passe al Senât saraial cualchi senatôr che al vûl rapresentâ il Friûl?"